

西泠仙詠卷二

目錄

潘閨巷詠潘逍遙

孤山詠林和靖

萬松嶺詠徐冲晦

蘇公祠詠蘇東坡

後湖詠蘇養直

月輪寺詠張君房

吳山詠徐夔

錢塘詠沈子舟

廣陵侯廟詠陸圭

西泠仙詠卷二 目錄

宋故宮詠皇甫履道

靈石寺詠顏寓李甲蕭耘

鳳皇泉詠張紫薇

飛仙里詠李芟

西林橋酒壚詠髻髻道人

棲霞嶺詠翦頭仙

靈隱詠蓑衣仙

錢塘詠錢一

南園詠陸放翁

南園詠牧童

黃犢嶺詠邱真人

瑞石山詠張紫陽

大德觀詠王重陽

三一閣詠白玉蟾

紫陽菴詠丁野鶴

金溪草堂詠虞伯生

浴鵲灣詠張伯雨

虎跑泉詠黃大癡

井西丹房詠張思廉

三仙閣詠張三丰

吳山詠冷啟敬

南屏詠高青邱

西泠仙詠卷二 目錄

高士鳴詠孫太初

西湖詠徐霞客

江上詠伍冲虛

西湖詠陸麗京

煙霞仙舍詠心月道人

百步塘詠水月老人

宗陽宮詠王崑陽

武林詠沈太和

大德觀詠黃隱真

西湖詠姚耕煙

孤山詠謝凝素

金鼓洞詠周太朗

金鼓洞詠高東籬

鶴林道院詠沈大虛

金鼓洞詠陳樵雲

金鼓洞詠飛來野鶴

松吹堂詠杭堇甫

樊榭山房詠厲太鴻

紫竹山房詠家句山先生

葛林園詠梁山舟先生

沈莊詠鮑淥飲

西園詠朱文正公

西泠仙詠卷二 目錄

阮公墩詠阮琅嬛師

冷泉亭詠宋茗香

白蓮堂詠吳澹川

金粟菴詠錢東生

天潛小隱詠汪季懷

翠淥園詠閔小良師

湖上詠陳春谷

閒地菴詠朱野鶴

野鷗莊詠錢叔美

懷仙閣詠盧子鶴

西泠仙詠卷二

懷仙閣定本

圓嶠真逸譔

潘閬巷詠潘逍遙

潘閬字逍遙江都人嘗居洛陽賣藥騎驢看山終日不返好事者繪爲圖宋初以能詩薦召爲四門博士坐盧多遜黨變姓名入中條山或云太谷人秦王府記室參軍秦王得罪髡髮爲僧而逃有逍遙集劉攽謂其詩不減劉長卿有登高峯塔詩贈林處士詩崇寧間武夷黃靜得其詩曰謫仙人也刻之石居錢塘太學東巷名潘閬巷寄園寄所寄稱有人遇仙者卽閬也

西泠仙詠卷二

一

青楊小巷胥秋藤彷彿東屯住少陵避難趙岐曾匿跡工詩賈島亦爲僧孤山贈鶴梅千樹高塔看雲月一稜絕似青蓮逢賀監謫仙佳詠在吳綾

孤山詠林和靖

和靖名逋字君復隱居孤山種梅豢鶴自適二十  
年不入城市眞宗賜粟帛詔長吏歲時勞問旣沒  
仁宗賜諡和靖先生有詩集墓在孤山後爲楊璉  
眞伽所發棺中惟一玉簪蓋仙人羽化之流身後  
若蟬蛻矣今祠墓爲林少穆許玉年諸人所修所  
居有放鶴亭巢居閣並補梅招鶴焉

碧蘿幽徑古祠開再拜咸平處士來梅鶴偶然爲眷屬湖

山依舊起樓臺寒巖霜老樓紅葉春墅煙深罨綠苔身後  
惟餘玉簪在巢居高閣是蓬萊

萬松嶺詠徐冲晦

徐復字復之建州人學易絕意進取慶歷初召見  
賜號冲晦處士見宋史隱逸傳錢塘兩處士和靖  
居孤山冲晦居萬松嶺夾湖相望嘗謂孫忉曰子  
孫世世不得離錢塘以永無兵燹也見北窗炙輠  
徽宗朝有徐奭亦賜號冲晦

萬松山翠接平岡高士當年有舊坊康節吟窩虛夜月君  
平卜肆冷斜陽隔湖鶴影投孤嶼繞屋鶯聲憶草堂聞道  
西泠兩冲晦隱居清節重錢塘

西泠仙詠卷二

二

蘇公祠詠蘇東坡

東坡名軾字子瞻又字和仲蜀眉州人守杭日多  
惠政民苦斥鹵公浚茅山一河專受江湖浚鹽橋  
一河專受湖水復造堰牖以爲湖水蓄洩之限且  
以餘力復完六井又取湖中葑田積爲長隄以通  
南北杭人名之曰蘇公隄家有畫像飲食必祝公  
前生爲五戒禪師方士謂公爲天上奎宿知夙根  
所在來去均不在人間也祠在孤山嘉慶中秦小

峴觀察建

葑影橫隄柳態柔西湖從此湛清流聽蟬寒碧尋前夢換  
馬春紅感舊愁白葛涼生枯衲社玉箏聲遠美人舟壽星

巖畔神游處水枕風船一樣秋

後湖詠蘇養直

養直名庠楚北人居後湖號後湖居士後湖左界  
白隄右接西村南挹巢居北繞葛陽以在孤山之  
後故曰後湖也嘗以屬玉雙飛水滿塘一詞見賞  
於東坡晚居廬山遇羅浮黃真人與丹服之髮再  
黑一目復瞭一日宴客云黃真人至遂立化

六橋煙雨靄平蕪更有詩翁說姓蘇  
穉穉荒田徵鶴稅鷓鴣小艇問漁租  
兩頭簫管開吟譙四面樓臺入畫圖  
我亦寶雲山下住西湖今是美人湖

月輪寺詠張君房

西泠仙詠卷二

三

君房字允方安陸人景德中進士官度支員外祥  
符中自御史臺謫官海寧適真宗崇尚道教盡以  
秘閣道書付杭州俾戚綸陳堯臣校正綸等同王  
欽若薦君房主其事編次得四千五百六十五卷  
進之復攝其精要萬餘條爲雲笈七籤蓋道家之  
言以天寶君說洞真爲上乘靈寶君說洞元爲中  
乘神保君說洞神爲下乘又太元太平太清三部  
爲輔經又正一法文遍陳三乘別爲一部統稱三  
洞真文總爲七部故君房取以爲名也道藏精華  
大略具於是矣見四庫全書提要又著乘異記麗  
情集科名分定錄潮說脞說知杭州錢塘多刊作

大字版印行於世仕至集賢校理年八十餘卒見  
默記月輪寺在月輪山卽六和塔院江月松風集  
云古錢塘令張君房曾宿月輪寺月中桂子下塔  
如牽牛子阻之無味

蓬萊小謫近東溟岱嶽泥金正勒銘誰薦陽冰書碧落爭  
看逸少寫黃庭葛洪自著神仙傳尹喜親傳道德經欲起  
高樓貯雲笈麗情一集說媼姪

余欲於吳山道  
觀建雲笈樓

### 吳山詠徐爽

爽錢塘人隱居吳山以修真終老徽宗聞其名賜  
號冲晦先生

青帝長生泣玉除紫微宣賜到山居茅盈自有修真訣种

### 西泠仙詠卷二

四

放應無封禪書蘿影翠深寒殿靜松花香細石壇虛姓名  
莫使韓翃誤高士坊前識舊廬

### 錢塘詠沈子舟

子舟名若濟遠祖當吳越錢氏時爲謀主遂爲錢  
塘人十許歲出家爲道士道藏釋典無不賅洽尤  
長於醫王漢之帥建康館之洞陽館俾鍊大藥徽  
宗再召賜號洞元大師紹興初服丹尸解

節度開門亦自雄軍諮曾有舊家風道通雲笈珠林外名  
在靈樞素問中汴水承恩青瑣闥攝山采藥紫芝翁金丹  
先證長生訣不待君王德壽宮

### 廣陵侯廟詠陸圭

圭官真州兵馬都監攻方臘死難淳祐中潮圮江  
岸屢築不就神率三女揚旗空中浮石水面岸賴  
以成事聞建廟封廣陵侯三女皆封夫人廟在江  
干石冢圭有宿韜光菴詩

彷彿旌旗颭上游當年壁壘古真州丹心破敵同蕪國青  
骨成神類蔣侯兒女彩鸞隨舵尾英雄白馬避潮頭廣陵  
祠宇因遺愛七發何勞證不休

圭封廣陵侯以曾官真州故也竹垞引以證曲江爲

錢塘者誤

### 宋故宮詠皇甫履道

履道名坦遇妙通真人得丹秘紹興中治顯仁太  
后目疾又爲仙韶甄娘治蹙布氣卽釋踊而行常

### 西泠仙詠卷二

五

相湖北帥李道女鳳娘爲天下母後孝宗聘爲恭  
王妃卽光宗后也將還廬山留一扇於禁中曰有  
發寒熱者以此扇之未幾宮中多患瘧用之皆驗  
還山築室御書清虛菴額道流咸集苦水遠使人  
荷鉏劬地應手泉湧德壽聞之御書神泉二大字  
見神仙通鑑廬山志

紫佩青囊出禁中更畱羅扇顯靈蹤神方何似孫思邈仙  
術真如杜子恭三殿月輪生欲滿六宮花影散來重相看  
拂袖還山去鸞鶴飛翔到處從

### 靈石寺詠顏寓李甲蕭耘

竹坡詩話云西湖諸寺惟南山靈石猶是舊屋僧



言頃時有數道人來丐食拒而不與乃題詩屋上而去字畫頗類李北海其詩云南鵑數回泉石西峯幾疊煙雲登攜孰以爲侶顏寓李甲蕭耘李甲近世人東坡以爲似郭忠恕善畫而文餘當是神仙也范石湖集有詩紀此事自注云顏寓李甲蕭耘題詩寺門方運筆時伸臂長丈餘闍人驚報主僧回顧已失後好事者譯之首句呂字二句洞字三句賓字是洞賓與三人來耳按李甲近世人則顏寓蕭耘亦近世人所譯甚穿鑿未必洞賓與三人偕來也

羣仙蹤跡等雲蘋靈石題詩說洞賓野鶴飛來原有伴戲

西泠仙詠卷二

六

鴻書罷更無人姓名曾記東坡識筆墨爭傳北海神最是石湖老居士賦詩堪補諾皋新

鳳皇泉詠張紫薇

方家峪劉媿好寺鳳皇泉三字乃張于湖紫薇孝祥所書夏執中爲后兄以孝祥書未工自書三字易之孝宗幸寺中詔以斧劈爲薪止用孝祥書孝祥精於翰墨人稱紫府仙見四朝聞見錄太廟前楹產芝孝祥作原芝文推行符瑞之說見于湖居士集劉龍洲有上張紫薇真仙詩云真仙原是昔于湖今在高樓何處居霏玉不容陪偉論撥灰猶爲作行書雲霞縹緲來旌節瓊玖玲瓏聞珮琚幽

顯殊途人世隔冷風吹雨送回車味其詩意大約是仙後降乩也

劉寺芙蓉向晚妍銀鈎新寫鳳皇泉鶯花尙弔紅霞帔翰墨原稱紫府仙白點曉霜楓葉溼翠生寒雨蘚花圓曲江居士題詩處應憶于湖內外篇

飛仙里詠李菱

乾道中濟南李菱字廷國寓臨安嘗詣淨慈寺過長橋於竹徑迷路見青衣道士分與燒筍食之身遂輕舉不復飲食後游茅山尋又入蜀隱青城山仙去後人慕之名其里曰飛仙里見列仙傳又容齋隨筆神仙通鑑

西泠仙詠卷二

七

南屏山畔竹林遙一杵鐘聲客過橋玉版禪師原有味青衣道士偶相招巖花露重紅欹笠礧樹雲深翠溼瓢句曲林巒大冢月仙蹤何處問歸樵

西林橋酒壚詠鬢髻道人

齊東野語載端平間周文璞趙師秀數詩人春日游蕩湖山飲西林橋酒壚皆大醉熟睡忽有鬢髻道人過而睨之哂曰詩仙醉耶願酒家善看客我當償酒錢以瓢中藥投水喫之地上成銀道人忽失所在

鬢髻雙髻髮垂肩來與詩人送酒錢笑爾梨花連甕飲任他芳草枕琴眠夕陽喚客鶯聲緩佳釀酣春燒夢圓玉佩

金貂等閒事岳陽三醉是神仙

棲霞嶺詠翦頭仙

紹興時大理寺卿周三畏不肯勘岳武穆獄挂冠  
去後有人遇翦頭仙人於延安葭州山中日惟飲  
水與人論宋事及咸陽冤死輒大哭忽不見空中  
墮紙曰周三畏拜謝蓋仙矣見樵書

短髮鬢髭被兩肩空山人識翦頭仙挂冠神武悲身世拂  
袖終南歷歲年鐵佛淒淒常沐雨金牌寂寂久沉煙倘因  
鶴駕棲霞過指點南枝一惘然

靈隱詠蓑衣仙

秦檜遇行者於靈隱有家在東南第一山句令押

西泠仙詠卷二

八

衙何粟物色之粟至宮殿見僧坐決事曰地藏王  
決檜殺岳飛事數卒引檜至身荷鐵枷謂粟曰傳  
語夫人東窗事發矣粟復命後遂出家蘇州元妙  
觀肉身存焉世所稱蓑衣真人是也見江湖雜記  
何處東南第一山此行眞見相公還紅塵莽莽空金穴黑  
獄漫漫待玉顏佛力自深華藏海人心休忘鬼門關蓑衣  
久已登眞去何事皮囊尙世間

錢塘詠錢一

錢一爲皂隸因秦檜酷刑致人死後少悔以流血  
爲度一乃汗豬血於板如是九年一旦立班中見  
足離地而起檜呵其爲妖隸以前情白曰某今日

應上昇遂乘雲而去見昨非菴日纂

神仙自古無資格伍伯功成亦上昇孔目形骸畱幻相押  
衙蹤跡證高僧簫鸞笙鶴邀同輩月地雲階到幾層放下  
屠刀便成佛前因不昧續禪燈

南園詠陸放翁

放翁名游字務觀山陰人官蜀晚歸鑑湖築快閣  
以居韓侂胄當國築南園於長橋乞記於楊誠齋  
誠齋拒之乃乞放翁作記記成侂胄開譙以謝出  
所愛妾四夫人號滿頭花者奉觴侂胄敗論者多  
議放翁之失園亭記何足輕重文字罪人此宋儒  
苛論也進士鄭棫自作南園記並礮石以獻韓以

西泠仙詠卷二

九

陸記爲重仆鄭石瘞之地韓敗鄭竟免見四朝聞  
見錄南園本孝宗御前別園光宗時慈福太后以  
賜侂胄有許閒堂西湖洞天歸耕之莊晚節香亭  
諸勝後仍歸御前改名慶樂理宗以賜榮王又改  
名勝景也放翁詩工且富足稱大家嘗夢故人相  
語曰我爲蓮花博士鏡湖新置官也君能斲爲之  
乎月得酒千壺亦不惡也遂以詩紀之曰白首歸  
修汗簡書每因囊粟歎侏儒不知月給千壺酒得  
似蓮花博士無見詞統越中有懷仙堂記祀梅福  
賀知章及放翁也見石笥山房集

大好蓮花博士才青山暫別鏡湖來懸燈曲榭春觴滿擘

阮華堂夜讌開紅縐錦裯人似玉碧疎金井水生苔如何  
晚節亭前菊不記南園手自栽

### 南園詠牧童

韓侂胄過南園山莊趙師異偕行至東村別墅宛  
然鄉井林薄中一牧童歌曰朝出耕田暮飯牛林  
泉風月共悠悠九重雖竊阿衡貴爭得功名到白  
頭趙呵曰平章在此誰敢唐突跡牧童至草廬屏  
上有詩云玉津園內行天討怨血空啼杜宇紅後  
侂胄爲史彌遠誅於玉津園見昨非菴日纂此事  
與秦檜靈隱遇僧相似彼主和議而害忠臣此禁  
僞學而逐大賢其罪皆不可赦故仙佛示現點化  
而無如其終不悟也

### 西泠仙詠卷二

十

朝出芸田暮放牛一生只合老林邱神仙幾輩邀青眼富  
貴何人到白頭虛有高文辱名士苦將僞學逐清流玉津  
何似南園好屏上題詩杜宇愁

### 黃犢嶺詠邱真人

在臨平山前相傳真人乘黃犢采藥於此生曲竹  
人取爲杖故老相傳邱隱士羽化棄杖於地其竹  
皆曲

何年高隱碧峯隈黃犢隨人采藥回雲外一襟披笠去雨  
中雙髻荷鋤來翠眠芳草橫青嶂紅謝疎花點綠苔欲訪  
仙翁舊行跡林香山翠儘徘徊

瑞石山詠張紫陽

三洞羣仙錄載天台張伯端字平叔受道法於呂祖弟子劉海蟾以傳石杏林杏林傳薛道光道光傳陳泥丸泥丸傳白玉蟾是爲南宗五祖嘗於毘陵紅梅閣著悟真篇八十一首又爲白玉蟾著金丹四百字居瑞石山是宋吳傑集慶堂遺趾平叔號紫陽故弟子徐宏道以紫陽名菴後范應虛作玉虛望江二樓范涑撰紫陽仙跡記

世宗憲皇帝謂紫陽悟真篇不著宗門一語外集不雜元門一語深入理域究明宗旨雍正十三年

勅封大慈圓通禪仙紫陽真人

西泠仙詠卷二

十一

求仙容易悟禪難集慶虛堂積翠盤靈跡長畱三洞錄新詩妙證九還丹禮星元鶴窺寒殿檄雨蒼龍下古壇瑞石亭前碑石在

軒皇輦路指層巒

大德觀詠王重陽

名嘉號害風南宋人北宗七派邱劉譚馬郝王孫皆其弟子元世祖時勅封重陽真人開化輔極帝君大德觀有斬妖臺洗劍池諸跡

一角高臺面列墉琳宮寒壓翠芙蓉山形依舊翔靈鳳仙派應知出火龍洗劍池荒秋水涸煉丹竈冷暮雲封金蓮七葉同時放我亦淵源溯北宗

三一閣詠白玉蟾

白玉蟾本姓葛名長庚號海瓊子又號蟾菴武夷  
散人神霄散吏紫清真人博洽儒書工書畫善畫  
梅嘗於黎母山得洞元雷法祈禳輒有異應晚事  
陳泥丸得聞天仙之道作修仙辨惑論以明天仙  
水仙地仙之次第又因張紫陽爲著金丹四百字  
作書以謝深明三教同源性命雙修之旨嘉定中  
召對稱旨命主太乙宮遂結精舍於此有辟劍池  
得月樓諸跡菴在包家山下山川壇右

黎母山中禮導師洞元雷法護蛟螭葛元家學能傳道李  
白仙才解賦詩搗藥禽歸寒夜碓埽花人去冷春祠祇今

西泠仙詠卷二

三

三一菴前路月裏新蟾話桂枝

紫陽菴詠丁野鶴

元丁野鶴錢塘人棄家爲全真道士居吳山之紫  
陽菴師徐洞陽有觀燈化鶴之異一日召妻王守  
素入山付偈云嬾散六十三妙用無人識順逆兩  
俱忘虛堂眞長寂抱膝而逝守素亦束髮爲女冠  
明道士范致虛建亭祀其遺蛻見武林紀事紫陽  
道院志輟耕錄瑞石山志

斜日明霞接畫闌隔江山色翠千盤夢中華表歸仙驥悟  
後塵緣謝采鸞青嶂雲深芑屨溼碧天風峭羽衣寒荒菴  
終古畱遺蛻瑶草松花滿石壇

金溪草堂詠虞伯生

伯生名集字邵菴臨川人允文五世孫累官奎章閣學士封仁壽郡公諡文靖有道園集少游錢塘居金溪草堂金沙港一名金溪也伯生和全真馮尊師蘇武慢詞二十闕仙遊山彭致中取而刻之爲鳴鶴餘音伯生自序之馮燕趙書生游沐遇異人得仙學賦蘇武慢二十篇前十篇道遺世之榮後十篇論修仙之事伯生得其傳故以七十二家符篆授張伯雨也

合澗春涼下夕陽兩峯雲影聚溪光松風碧捲鄰家閣杏  
兩紅低隔苑牆港漾金沙秋水靜橋橫玉帶暮煙涼商量

西泠仙詠卷二

三

羅帕填詞日應憶西泠舊草堂

浴鵠灣詠張伯雨

張雨一名天雨字伯雨錢塘黃冠號真居九成之裔後入華陽洞自號句曲外史初見虞伯生伯生問能作幾家符篆曰不能伯生連書七十二家伯雨下拜曰真吾師也初居西馬塍建茵閣詩所云歸錦橋邊停舫子散花灘上築樓居是也又嘗居葛嶺有神光樓井西丹房隱真館後居浴鵠灣有玉鈎橋賣玉鈎所建也所居名登善菴有黃篋樓自營墓於靈石隴卒遂葬焉伯雨工詩精繪事善鼓琴與趙松雪倪雲林楊鐵崖薩鴈門鮮虞伯機



相友善而高致靈跡復如此蓋稚川之後一人而已

何處瓊樓聽紫簫散花灘外雨瀟瀟醉中寫石奇雲立松下論琴細雪飄金茵舊山閒小閣玉鈎幽澗影長橋昨從浴鵲灣頭過蕊佩癡仙若可招

虎跑泉詠黃大癡

黃公望字子久本姓陸世家常熟繼永嘉黃氏遂徙富春善畫工詩有大癡山人集居西湖赤山之笕箕泉後於虎跑石上乘雲仙去按紫桃軒雜綴載黃子久年九十餘碧瞳丹頰一日過虎跑泉與數客立石上忽四山雲霧湧溢遂不見咸以爲仙

西泠仙詠卷二

古

去初疑耽畫者飾之今緡道藏金文玉笈經子久編錄非一以金蓬頭爲師莫日鼎冷啟敬張三丰爲友生有夙慧其仙去也宜哉

扁舟載酒傍花還畫派荆關伯仲間舊隱煙波尙湖水卜居巖壑富春山秋林霜染紅千樹夜澗寒澄碧一灣真個乘雲竟仙去笕箕泉上草堂閒

井西丹房詠張思廉

思廉名憲號玉笥生吳人鐵崖弟子也仕張吳吳亾避跡以終有井西丹房詩云葛井西頭更向西丹房高與白雲齊鉛田虎下飛紅電汞海龍沈結紫泥山鬼俯闌窺火候鑪神伏地丐刀圭飲餘一

蓋松黃酒坐聽鶡聲松上啼蓋滄桑之感遁跡黃  
冠煉姪調嬰深明丹旨矣夔州府舊志云卽三丰  
也同句漏乞丹砂來訪當年抱樸家何處故宮黃菜葉此  
間仙館碧桃花光生石匣巡檐蝠聲墮銀牀噪嶺鴉誰似  
鐵崖老居士黃冠長侍絳帷紗

三仙閣詠張三丰

三丰名君寶字全一名玄玄遼人神仙通鑑云  
丁令威後身當與張思廉同是分光也生有異質  
嘗與人議論三教等書若決江河初寓安陸縣太  
平宮後入武當山脩煉往來天柱紫霄諸峯世稱  
張邈邇洪武永樂先後訪求皆不出特飭正一張

西泠仙詠卷二

五

碧雲於武當建宮以俟天順中贈爲通微顯化真  
人嘗於廣陵賦瓊花詩云瓊枝玉樹屬仙家未識  
人間有此花清致不沾凡雨露高標猶帶古煙霞  
歷年旣久何嘗老舉世無雙莫浪誇便欲載回天  
上去擬從博望借靈槎蓋自况也所著玄譚集合  
釋氏外景道家內景而一之尤以任督二脈爲命  
功之綱領大旨主於先修性後修命而闢爐鼎闡  
丹之說或以旌陽道光翠虛玉蟾諸真所闢採戰  
之張三峯當之不知彼年代旣前名字又異另是  
一人世人多誤爲一也雖所作無根樹詩屢言花  
酒神仙意主接樹添油仍是雙修氣交之法特沿

叅同悟真之習爲旁門藉口耳三仙閣在吳山三  
茆觀側內雕三像一坐一立一臥相傳三丰避永  
樂徵召隱跡於此尚有御札存閣中

省識三仙是一仙尙餘高閣此山巔遠辭玉闕羅公遠高  
臥金牀馬自然龍去滇池雲漠漠鷗啼鍾阜月娟娟當年  
御札空相訪寂寞長陵蔓草煙

吳山詠冷啟敬

冷謙字啟敬號龍陽子武陵人元中統初與劉秉  
忠從沙門海雲游無書不讀精易尤深邵學及百  
家方術靡不洞習畫學趙子昂李思訓以善繪名  
後遇異人於淮陽授中黃大丹平叔悟真之旨年

西泠仙詠卷二

七

百餘歲隱居曉音律善鼓琴洪武初授協律郎仙  
跡甚著有入藏取金畫壁登舟之異劉基爲賦泉

石歌

精通樂律按紅牙游戲仙山踏落花官庫有錢聊貰醉畫  
舟在壁便攜家臥苔蒼石鏘寒雪隔竹流泉響翠霞太息  
橫琴人不見碧雲無際月生華

南屏詠高青邱

高啟字季迪長洲人與張羽諸人稱北郭十友又  
與楊基等稱吳中四傑張吳時避地吳淞之青邱  
因以自號明初徵修元史擢戶部侍郎辭乞歸後  
以爲魏觀作上梁文爲讒人譖死非其罪也曾至

武林有岳王墓南宋故宮諸詩其送錢塘守云休  
沐南屏煩一到松間尋我舊題名則南屏固游屐  
所經也公之逝也尸解也既離塵世卽登上真掌  
法南宮輔相北帝道光辛卯顯跡於吳郡駐鶴壇  
因弟子汪心澈誦大洞玉章經十萬卷擢九天洪  
濟明德真圓真人又於邗上通元壇以洛書九宮  
法禱雨立降今於妙香天室主雲淨壇弟子輩於  
葆元堂斗姥閣塑像供奉焉  
萬松陰裏舊題名翠壁莓苔雨後生猿踏落花香有跡鶴  
棲疎影靜無聲林端鐘靜殘陽墮臺上琴閒夜月明畱取  
當年仙蹟在瑤潭香火接瑤京

西泠仙詠卷二

七

高士鳴詠孫太初

太初名一元秦人嘗棲太白之巔故稱太白山人  
以鐵篋鶴瓢自隨居南屏名所居曰挂瓢堂嘗與  
友人張寰泛西湖舉李白改沔川南湖爲郎官湖  
例欲改西湖爲高士湖人因稱所居爲高士鳴在  
蓮花洞西有鶴渚在雷峯乃九杞山人置田爲太  
初飼鶴者有鶴田券後入湖州隱苕溪歸雲菴相  
傳以爲仙去

太白山人隱興長挂瓢遺韻響松篁司空池館王官谷摩  
詰園林華子岡鶴去前塵秋水澹雲歸何處月華涼祇今  
高士湖邊過誰識盧鴻舊草堂

西湖詠徐霞客

霞客名宏祖字振之江陰人霞客其別字也黃石齋爲更號霞逸而世以陳睂公所號霞客行徧游海內名山著游記數百篇曾登空同訪廣成子所居遠至塞外知江河同發源崑崙辨三龍大勢謂江大於河著沂江紀源一篇以訂桑經酈注之誤文震孟稱爲地行仙人蓋東方曼倩禽夏向子平之流矣陳木叔所撰墓志言繫纜西子湖匝月則湖上蹤蹟亦多惜游記佚此篇也

愛作盧敖汗漫游一生仙骨不知秋希夷蹤蹟畱諸嶽曼倩文章紀十洲服霧餐霞應有訣驂鸞控鶴更無儔笑余偃臥空山裏雲壑惟從枕障求

西泠仙詠卷二

六

江上詠伍冲虛

名守陽字端陽吉安人宗師守虛之兄入廬山事曹老師李泥丸煉外丹垂成而飛者五十七次得五雷法丹成將服之泥丸曰五臟未堅服恐不利乃點石濟世吉王師事之恐禍及遁至天台遇趙復陽命至王屋訪王崑陽受三大戒返服還丹質凡咸化自號冲虛子著仙佛合宗天仙正理

仙佛何人識合宗冲虛妙理最圓融煉丹未是登真訣點石方成濟世功王屋松雲瑤島近匡廬雪瀑石梁空豫章帝子譚經處回首斜陽有故宮

西湖詠陸麗京

麗京名圻字講山西冷十子之一著威鳳堂集冥報錄以莊史案被累既免棄家遠遊不歸游嶺南禮天然禪師於丹霞法名德龍字誰菴有人見之武當山洪昉思答人問講山蹤蹟詩云君問西冷陸講山飄然瓶鉢竟忘還乘雲恰似孤飛鶴來往天台雁宕間或云仙去

君問西冷陸講山朱霞天半杳難攀逸情自與冥鴻遠孤影真如瘦鶴間桐鳴墓前傷逝去弟鯤庭以行人殉國難於桐鳴楓江劫後幸生還煙雲何處神仙蹟祇在天台鴈宕間

烟霞仙舍詠心月道人

西冷仙詠卷二

九

陳元英字寂寧明未人好道受禮斗修煉之術於尚元子洞澈元妙言未來事多驗皈依者衆諸弟子爲營小閣於清平山曰寂寧道院順治丙戌上昇康熙丁亥徐鉞爲記立碑屢於乩壇降筆書法似褚河南署款或曰心月道人或曰陳道人張君仲雅有題先生小像詩云仙壇筆墨正縱橫喜見圖中道貌清百八十年容識面分明我亦似長生張叔未題云荔支峯陳處士小像

雲房書法洞賓詩又見吾宗逸世姿應與玉蟾吟桂樹也同黃鶴畫榴皮蘿陰夜月三生石松影斜陽一局碁閒向華山叅睡譜寂寧何必遜希夷

百步塘詠水月老人

百步塘在艮山門外寒水相繞漁煙遠生塘上有  
水月菴卽水月老人故居老人姓孫名文字文石  
號水月會稽諸生隱於杭榜所居爲梅園性恬靜  
一介不取間爲長短歌詞問其年嘗稱九十髮盡  
禿人多以僧呼之范忠貞公撫浙老人曾從忠貞  
大父遊忠貞幼時老人撫其背曰是兒當建節吾  
土吾猶及見之至是忠貞聞太夫人言物色得之  
屏騶從往謁捐俸爲建百步塘勒石記之時西溪  
多虎患老人謂忠貞曰山中大蟲任打門內大蟲  
休惹忠貞遷聞老人曰耳後火發須要有主意其

西泠仙詠卷二

三

後忠貞竟死耿難老人素不喜世事及是人以爲  
前知爭就問之老人厭惡避世不知所終土人改  
其居曰水月菴肖老人若僧像召緇徒奉之池北  
偶談稱爲水月和尙有正味齋集中有詩

一徑沙河百步塘祇今遺趾贖茆堂分明處士郭文舉何  
似仙人費長房劫外烽煙春寂寂望中雲樹月蒼蒼紅螺  
行者曾相識何處梅園發古香

宗陽宮詠王崑陽

原名平山西潞安人幼有道士顧之曰樵陽再生  
矣至王屋山遇趙復陽命名常月授以三大戒常  
說戒於京師白雲觀秣陵碧苑及杭之宗陽宮弟

子千餘人成道者不可屈指道家有戒始邱祖以  
三大戒授世則始崑陽所傳碧苑壇經與六祖壇  
經相伯仲洵仙佛之梯航也爲龍門第七代律師  
住世一百五十九歲

七代單傳衍北宗真詮賴有闡揚功龍門共仰靈光殿鶴  
駕曾棲德壽宮命學端須叅性學元風原不異儒風一編  
碧苑壇經在三戒明明日正中

武林詠沈太和

名常敬字一齋桐鄉人常習靈匿於金蓋揣六韜  
壬奇於武林習長生久視於元蓋洞天從平陽子  
得太上宗旨遂隱茆山爲龍門第七代宗師住世

西泠仙詠卷二

三

一百三十一歲

偶將壬遁習韜鈴賣卦橋亭市隱兼康節行窩閒掃地君  
平卜肆靜垂簾思從元蓋求丹訣曾爲靈匿下玉籤終向  
華陽遂高躅一樽何必遜陶潛

大德觀詠黃隱真

名守圓易名守元自號赤陽子原名珏號隱真烏  
程人世居震澤明諸生幼孤傭工自給出遊得書  
法於董香光至武林日賣字以沽飲訪上陽子於  
大德觀得筆籙壬奇諸書潛習於天目甲申易羽  
衣出至茆山太和宗師書守圓二字以待之返湖  
隱於碧巖偕陶靖菴入梅花島偕入京受大戒於



崑陽至杭居大德周太朗來求戒越十四年靖菴  
以如意芝杖寄以付太朗畱識而逝爲龍門第八  
代律師葬天官山

滄桑劫後事全非焚却儒衣換羽衣大德觀中畱隱蹟上  
陽子後悟真機林中仙鶴翔華表鳥上梅花入翠微宗律  
何人承一貫棲霞嶺畔白雲飛

西湖詠姚耕煙

名太寧石門人年十三見賞於冲虛子從征猗猗  
陪宴土司飛矢入營斃侍卒危坐如常隱西湖自  
號耕煙子會冲虛子來浙師事之盡得其傳謝凝  
素造問長生訣爲書令訪冲虛送至江干立逝七

西冷仙詠卷二

三

日不仆居民爲葬之六和塔凝素至楚遇之龜山  
示與冲虛相見期忽不見

河魁玉帳坐談兵飛矢當筵了不驚蘋葉微波浮曉艇桃  
花細雨約春耕郎官湖畔疑重見羅刹江頭記送行曾向  
月輪山下過墓門長聽夜潮聲

孤山詠謝凝素

名太易武進人嘗寓毘陵紅梅閣月夜聞羣仙環  
佩聲得白玉蟾註道德經伍冲虛爲之解釋嘗居  
孤山謁王崑陽於宗陽宮後返金蓋梅花島陶靖  
菴比之白鶴黃赤陽稱爲梅仙嘗著金仙證論慧  
命經二書今爲僧柳華陽所刻

紅梅閣畔棲元處金蓋山中種樹年放鶴有亭來偶爾冥  
鴻無蹟去翩然訣從道德真經得書任華陽釋子傳欲向  
巢居問和靖生前生後總神仙相傳為和靖後身

金鼓洞詠周太朗

名明陽字元真震澤人明諸生隨父官京師謁白  
雲觀禮七真願出家黃崑陽曰師在江南宗教將  
於汝一貫至茆山事孫玉陽從事宗教遇黃赤陽  
於大德觀受大戒至金鼓挂瓢三日洞主僧慧登  
以山施之始結茆今鶴林道院也為龍門第九代  
律師弟子千餘人得宗旨者高東籬戴停雲方凝  
陽金靜靈孟逸陽東籬則沈太虛之師也

西冷仙詠卷二

鶴林道院開山處此地青山合姓周金闕選仙如選佛玉  
天同證亦同修挂瓢洞口雲初曉倚杖巖前月始秋我媿  
龍門演宗派年年筇笠想從遊

金鼓洞詠高東籬

東籬名清昱漢軍任臺灣觀察年八十入山師周  
太朗為龍門第十代弟子住天台桐柏宮主講金  
鼓洞鶴林道院講席年百四十歲羽化沈太虛閔  
小艮其弟子也

八十還丹未覺遲先生纔是入山時曾從梅島師修靜亦  
似桃源問義熙桐柏雲深龍聽瀑蓬萊晝靜鶴窺碁磻溪  
宗派淵源在一角雲窩我所思

鶴林道院詠沈太虛

太虛名一炳吳興諸生生而有文在手曰太虛主  
宰事高東籬爲弟子得太上李泥丸之傳泥丸爲  
太虛七至金蓋或云卽李八百卽李筌也以誦玉  
章經證清淨果深契天仙心傳混化之旨祈雨禳  
疫不事科儀惟以誠感嘗言修真之士一以道德  
爲主有道德者有神通無道德者無神通也生化  
皆於吳興開化院沒時紅光燭霄漢先期分形徧  
別所知並降靈於蜀示至真經逸事甚多詳見金  
蓋心燈

金蓋雲巢有舊壇親承丹訣李泥丸太虛主宰文長在道

西泠仙詠卷二

五

德神通論不刊桐柏宮中曾駐鶴梅花島上記驂鸞天仙  
自有心傳訣玉女前頭羽帔寒胡剛剛君於雲間所度女  
仙也卽至真經中太虛玉

女胡  
真人

金鼓洞詠陳樵雲

名陽復原名去非字翼庭歸安人世居荻岡從隆  
巖受紫光梵斗遂休雲巢日夜虔禮甘露降庭樹  
朱蘭歲放么鳳羣翔輕雲律師授以律宗出遊楚  
豫與李赤脚張蓬頭金懷懷龍門道士輩多所印  
證主餘杭三元宮禱雨立應沒葬天柱金筑坪塑  
像三元宮邑大水湖隄將決像忽躍出浮水面而  
水退邑令張君吉安爲堂以祠

一陽來復見天真同派如君有幾人和氣能令甘露降潛  
心長契歲華春蓬萊宮闕畱蹤蹟苜蓿盤餐記主賓閱良甫先  
生秉鐸餘杭與君相善即小良師之尊人也頻向葆元堂畔禮分明金筑證前  
身

金鼓洞詠飛來野鶴

乾隆中有道士於金鼓洞鶴林道院壁上大書飛  
來野鶴四字體類飛白勢甚奇偉殆仙筆也余年  
尚幼先府君攜余往觀曾爲一詩紀之云道人  
本是青天鶴仙翮凌虛入寥廓有時遊戲下人間  
醉攬秋煙踏雲壑鶴林道院鶴所居仙人樓閣橫  
空虛興來題名向祠壁傾城走看仙人書棲霞嶺

西泠仙詠卷二

五

上深雲樹舊是仙人題壁處豈是當年丁野鶴乘  
興飛來復飛去君不見鍾離書榜佛國開靈石亦  
見蕭耘來此間殘墨尙畱蹟煙雲黯澹生莓苔鶴  
性宜仙更宜野鶴壽不知其紀也北山靈鷲亦飛  
來洞中我是呼猿者詩載種藥齋集中按金鼓洞  
爲吳興金蓋山下院鶴林道院爲龍門第九輩弟  
子周太朗開山陶東籬沈太虛諸真咸修道於此  
宜有仙真往來也

滿地松陰滿徑苔何年野鶴此飛來楸皮作字雲生壁蕉  
葉題詩月上臺梅嶼迴翔共寥廓芝田遊戲隔蓬萊擘窠  
大筆淋漓甚始信仙人有別才

松吹堂詠杭堇浦

堇浦名世駿博學工文章舉乾隆丙辰鴻博入翰林以言事放歸自號秦亭老民有松吹堂詩文集前世觀音座前寄靈童子也見新齊諧

放膽文章館閣推書堂歸傍亂松開龍鱗瘦入新詩卷鶴蓋香飄濁酒杯微月光畱清影在長風聲捲怒濤來寄靈畢竟歸真否蓮座花前禮善才

樊榭山房詠厲太鴻

名鶚錢塘孝廉乾隆己未以鴻博徵詩品幽潔世稱浙派杭州至今重之無子郡中詩人爲卜葬西溪花鳴栗主奉交蘆菴琅嬛節相撫浙飭縣防護

西泠仙詠卷二

三

所作游仙詩三百首極凌雲御風之致常於邗上降乩

分明生後與生前浙派詩成萬口傳邗上題襟新著錄茗溪打槩舊因緣言從跨鶴驂鸞日回憶餐霞服霧年畱得高吟三百首曹唐解賦小游仙

紫竹山房詠家句山先生

先生名兆崙以進士舉乾隆丙辰鴻博入翰林官太僕卿有紫竹山房詩文集前世爲文昌宮中人沒後仍歸桂宮見新齊諧

家住城西近翠寰早年壇坫重湖山大科聲望華林貴小學津梁弟子嫻紫籜春深香冉冉碧筠日暮影斑斑一編

曾校宗英集仙苑琳琅在世間

先生詩文集余曾校一過議另付梓未果

葛林園詠梁山舟先生

先生名同書字元穎得貫酸齋所書山舟二字因以爲號又自號頻羅居士相國文莊公子早年入翰林卽乞病歸書法見重海內生平未嘗宿內室彭祖經所云上士異牀中士異被服藥百裹不如獨臥者先生有焉年九十餘病中有人語云西方缺一羅漢本以相待今主雲先至得之君可歸矣又數年卒葛林園在西湖葛嶺下隔湖卽和靖故居先生嘗獨居於此湖淥山翠得於仙者深矣

虞褚書名一代尊逸情高致見清門證來羅漢非初果修

西泠仙詠卷二

三

到神仙有夙根和靖巢居梅樹老稚川丹井藥爐温生平

最感喬公語葛隴西頭問謝墩

余幼年謁公於里第座客譽之先生曰此君風骨英

異習襟高曠神仙中人狀元宰相不足多也勿徒以才人目之崦嵫景迫學道無成車過腹痛之言思之彌深耿結

沈莊詠鮑淥飲

名廷博字以文新安人寄居烏鎮刊知不足齋叢書流傳海外

高宗

仁宗兩朝咸加 褒賞君立心純粹以道通儒以儒通道

謂金蓋爲呂祖選仙道場九百年勝地呂祖儒者

宜改梅花觀爲梅花書院當奉

欽賜圖書集成尊藏惜歸道山未竟其志然勸朱春陽居

雲巢而呂祖始有專殿勸小良先生復齊假菴而  
梅花館之規模復振桂宮玉局定有前緣矣沈莊  
在西湖君常寓此

鮑照才名海外傳能通儒理卽神仙期將鹿洞譚經席永  
作龍門護法船梅觀詠花空有約羽陵曝蠹惜無緣夕陽  
何處頻相見君有夕陽詩  
人稱鮑夕陽湖水湖煙四十年

西園詠朱文正公

公名珪字石君大興人官大學士自知前生爲文  
昌宮中座前盤石故字石君晚號盤陀老人嘗設  
讌以享前世眷屬所爲古詩多參同悟真之旨讀  
者每多未信然證文偉於楚北表曇陽於婁東嘗

西泠仙詠卷二

天

爲呂祖請加封號入祀典其爲仙也無疑矣曾視  
浙學西園學使者署園也

富貴能將福慧修談禪太傅最優游聽松心蹟陶貞白煨  
芋功名李鄴侯五嶽真形芝館靜一峯靈蹟桂宮秋蟠桃  
仙李門牆樹紫府真人第一流謂阮琅  
嬛師

阮公墩詠阮琅嬛師

師名元字伯元又字雲臺儀徵人博綜經籍尤深  
漢學著書以表章經術爲主海內奉爲圭臬初視  
浙學後爲浙撫禮士恤民賑荒籌海崇功惠政美  
不勝書以協辦大學士總督雲貴去浙二十餘年  
浙人思之猶若朝夕家有畫像飲食必祝不減昔

人之思東坡也座主朱文正公嘗謂人曰吾門下  
士前生多文昌宮中人惟阮某爲紫府真人後身  
故福慧最勝公初不信二氏近以述從事元門萬  
里書來常問空同函關之事夙根固自不同也阮  
公墩在湖中三潭東南乃浚湖積葑所成若蘇隄  
矣

百年青史定無儔經濟文章第一流位業前生原紫府煙  
霞此地更瀛舟瀛舟本在節署後移白公祠池上爲避喧籌海之地太平宰相多功  
業上界神仙有唱酬金馬碧雞天萬里一作畱得一墩終古在月華  
長照望湖樓

冷泉亭詠宋茗香

西泠仙詠卷二

无

茗香名大樽仁和人官助教謝病歸好爲山澤之  
游往來湖上夜游不及歸輒枕石臥松陰中詩境  
超妙似太白嘗言詩人身後一邱一壑可得散仙  
歿之日人見其偕一客飲近村酒肆中迹之已渺  
人咸以爲仙去

客兒亭畔易黃昏何處堪招宋玉魂詩骨高寒棲瘦鶴嘯  
聲清越答孤猿林間梵響流雲氣水上松陰畫月痕兩澗  
春淙一靈鷲酒壚有約待君論

白蓮堂詠吳澹川

澹川名文溥嘉興人曾次高曠壯游海外客楚戎  
幕喜論兵事善長嘯迥然有鸞鳳之音又嘗夢身



化爲鶴翩翩而舞若莊生之夢爲胡蝶也所著南野堂詩集琅嬛先生稱爲兩浙詩人第一沒二十餘年近有人見於黃鶴樓題詩有姓名好問黃仙鶴蹤蹟休疑白玉蟾句殆已仙耶白蓮堂在西湖招慶寺君嘗下榻於此

南野詩壇有舊盟西泠禪榻證三生靜依蕭寺聽鐘坐閒向蘇隄策杖行蘿葉當階秋雨細松陰滿地夜雲輕問君長嘯歸何處黃鶴樓頭月自明

### 金粟菴詠錢東生

名林仁和人官翰林學士余庚申同年也習養生家言嘗判陰曹事多前知自知死期前數日料量

### 西泠仙詠卷二

三

儲備井井有條旣逝滿屋作丹砂氣初慮作閻羅旣曰免矣臨終人見山西監察燈在門

可容名姓注丹臺應有靈光燭斗魁陽世玉堂新典籍陰曹鐵案大輪迴須知泉路通雲路莫以仙才作鬼才高位儘多成道少蓬萊宮闕幾人來

### 天潛小隱詠汪季懷

季懷名瑜錢塘人余子婦端之尊人也性寬厚多長者行善鼓琴工詩通醫理所居曰天潛小隱卽以自號若陶貞白之華陽隱居也道光癸未冬余歸錢塘寓西湖黃葉樓夢君過余言前生本紫宮侍書以生平無過得歸舊地甚清暇當從君至吳

門一視端也次日顧君西梅過余湖樓手一卷曰  
此君親家汪君季懷天女散花小像也存余家二  
十餘年久欲歸其後人檢之不得昨忽得之案頭  
而君適至豈非數耶故攜以奉君也語以昨夢互  
相歎詫因攜歸付端供奉之

琴囊詩卷悟聞根彷彿天潛老閉門水榭鶴歸秋雨細山  
樓猿嘯嶺煙昏畫船客至談仙蹟紫府人來記夢痕是處  
芥瓶畱文室左家嬌女解招魂

翠淥園詠閔小良師

師名茗莩字補之吳興諸生九歲慕道與沈太虛  
同事高東籬爲弟子而實受道法於太虛兄事實

西冷仙詠卷二

三

師事也嘗官滇至雞足山以岷陽三大戒易梵音  
斗咒西竺心宗於黃守中守中名野闍闍婆中印  
度人元時入中國者也師於陰陽爐鼎之道靡不  
宣究晚乃一歸清淨性命雙修尤以性功爲主所  
刊書隱樓叢書以三尼醫世說述天仙心傳爲最  
勝所至禽畜互乳草樹交芬善氣所敷動植胥化  
得中和位育之道焉

金蓋分明演一燈三尼醫世說三乘身爲爐鼎心爲藥佛  
卽神仙道卽僧命蒂固於花萼歛性光定到月華澄年來  
親侍瑤壇席雲笈眞詮手自贍

湖上詠陳春谷

名陽真字太樸原名樸生又號棲雲子辭婚不娶  
遇李蓬頭偕至杭遇有道卽師之通內外典十八  
丹頭無不洞悉父母夢神謂其已得元宗後當證  
果金蓋父母藉以東昇五朝九華七朝南海三至  
五臺往還桐柏委羽間專事煉命父母由是還少  
證果羣叩其故曰上昇之道全憑乎神神則藉氣  
氣則藉精積精纍氣纍氣足神神之用大矣懶雲  
子授以三戒

妙蘊能參精氣神解談元理見天真自明宗旨承三戒能  
以誠心格二親露處不妨花作幄雲游到處羽爲輪至今  
金蓋山頭寺嗣律矜嚴少替人

西泠仙詠卷二

三

閒地菴詠朱野鶴

野鶴名照字古愚海州人中年從事元門後見同  
學者三人皆不成乃徧游名山得性學於金山慧  
大師一意性功深得合一之旨定中見市肆所刲  
羊豕皆爲人身因斷葷血道光甲午與華胥子相  
遇鬱洲山下劇譚三日相得若無著天親也嘗至  
西湖閒地菴遇同堂七僧皆明性功爲他處名利  
所未有云將辭家寄菴終老也有野鶴詩八十一  
首多言性功若紫陽悟真焉

名山到處禮高僧歸臥雲臺最上層赤足屢逢仙採藥白  
頭親遇佛傳燈眼光清淨明於月心境高寒冷似冰畢竟

西湖好煙水一菴閒地待紅藤

野鷗莊詠錢叔美

名杜字松壺東生弟也工詩善畫幼年隨宦滇南  
患瘵疾飲夜交藤汁始瘳中年卜居秣陵之陶谷  
余夢中與君前世同爲西湖壑菴僧往來中州袁  
浦近卜居湖上修餐霞服霧之術以絳州道士十  
六字訣易余一字金言

鬼被誰貽柿蒂綾

君入蜀舟被竊失其襪被有興國州徐  
姓貽以被僅寬尺許類棺中物後亦失

之仙槩曾飲夜交藤雪中騎象詩雙管琴外飛鴻畫一燈

老屋尙餘陶谷樹前身同證壑菴僧絳州丹訣嵩陽隱閒  
話湖天夜月澄

西泠仙詠卷二

三

懷仙閣詠盧子鶴

子鶴不知何許人曰圓嶠真逸道名也曰香苑覺  
民釋名也曰鬱洲旅逸世名也與摩鉢前生同玉  
局校錄今爲神霄玉府兩宮掌籍簽書紫微內翰  
受人元秘旨於呼猿洞主受天仙心法於金蓋先  
生嘗誦頂珠普吉真言道姥臨雲淨壇所傳也於  
龍門爲第十二輩著三教真詮人元秘旨法苑卮  
言青郭內經西泠五集華胥七編全家奉道受籙  
者九人懷仙閣在西湖翠淥園或云此其前世姓  
名或云託名若李北海之伏靈芝黃仙鶴月泉吟  
社之連文鳳也

前世應爲無是公今生且作信天翁家居東菜西魚地人  
在南花北夢中山翠破雲浮枕簟月華澄水漾簾櫳全家  
道氣濃如許各有靈光炳太空